



Expediente IET: P-20-550
Proxecto: Parque eólico Reboiro
Concellos: Baralla, Castroverde e O Corgo (Lugo)
Promotor: Green Capital Power, S.L.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 02/06/2022 o Servizo de Enerxía e Minas de Lugo da Vicepresidencia Primeira e Consellería de Economía, Industria e Innovación, somete a informe do Instituto de Estudos do Territorio (IET) a documentación do proxecto de Parque eólico Reboiro.

1. Antecedentes:

O IET emitiu informes sobre este proxecto con datas de 02/11/2020, 14/03/2022 e 30/05/2022 no marco do procedemento de avaliación de impacto ambiental ordinaria.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia, aprobado polo Decreto 96/2020, do 29 de maio (RLPPG).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do RLPPG.

3. Análise do EIIP, dos efectos do proxecto sobre a paisaxe e das medidas de integración paisaxística:

A documentación que achega o Servizo de Enerxía e Minas de Lugo consiste nun escrito de resposta da empresa promotora (documento con data do 01/06/2022) ao informe do IET do 30/05/2022 no que se manifesta que a alternativa de realizar camiños de acceso de nova execución paralelos aos existentes para evitar a afección aos valados aumentaría os movementos de terra e crearía novos desmontes e terrapléns con maior impacto visual. Así pois, indican que os valados afectados serán repostos no novo linde cos mesmos materiais e a mesma técnica construtiva. Porén, sinalan que durante o replanteo da obra tratarán de axustar as infraestruturas para evitar a afección aos muros, na medida do posible.

Non se produce ningún cambio no deseño das instalacións do parque, polo que os seus efectos sobre a paisaxe serán os que xa se valoraron en anteriores informes.



En canto as medidas de integración paisaxística referentes á reposición dos valados tradicionais afectados poden considerarse adecuadas, tendo en conta que se xustifica que a alternativa de creación de novos camiños de acceso ás infraestruturas provocaría un maior impacto na contorna.

4. Conclusión:

Como xa se tiña indicado nos anteriores informes, o principal impacto paisaxístico deste proxecto será a incidencia visual producida polos aeroxeradores, que pola súa forma e altura, serán visibles desde unha ampla extensión de terreos e a longas distancias; esta incidencia perdurará durante todo o tempo en que estean instalados os aeroxeradores, e verase incrementada polo efecto sinérxico derivado da presenza doutros parques eólicos na contorna. Neste caso, entre as zonas afectadas pola incidencia visual cabe destacar os núcleos máis próximos. Esta incidencia visual se ben non supón un impacto crítico, non poderá ser mitigada con medidas correctoras, agás nos núcleos rurais mediante as barreiras vexetais establecidas no EIIP. Tamén se producirán afeccións a elementos compositivos das paisaxes como son os valados tradicionais.

En todo caso, de acordo co artigo 30.3 do Regulamento da Lei 7/2008, do 7 de xullo, de protección da paisaxe de Galicia, as medidas preventivas correctoras propostas para minimizar a afección aos valados tradicionais, deberán quedar oportunamente recollidas no proxecto, sen que sexa necesario someter de novo a informe do IET esta documentación.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

